

Uunga siunnersuut: Aningaasarsianit akileraarutit pillugit Inatsisartut inatsisaata, akileraaruserinermik ingerlatsineq pillugu Inatsisartut inatsisaata aamma sulisoqarnermut akitsuut pillugu Inatsisartut inatsisaata allanngortinneqarnerat pillugu Inatsisartut inatsisaat

(Aningaasaqarnermut Akileraartarnermullu Naalakkersuisoq)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerpeqarnera

Naalakkersuisut sinnerlugit Aningaasaqarnermut Akileraartarnermullu Ataatsimiititaliap isumaliutissiisutaanut qjarusuppunga.

Siunnersuutip akuersissutiginnissaanik ataatsimiititaliami amerlanerussutillit inassuteqarnerat Naalakkersuisut nuannaarutigaat. Aaqqissuusseqqinnermi anguniakkat pillugit ataatsimiititaliami ikinnerussuteqartut tapersersuuteqarput, taamaattorli assigiinngitsunik patsiseqarlutik inatsisissatut siunnersuut tamakkiisoq tapersersorsinnaanagu.

Akileraartarnermik aaqqissuusseqqinneq pillugu Inatsisartut partiivisa akornanni sutigut tamatigut isumaqatigiinnissaq pisariitsuunnigilaq, tamattami politikikkut assigiinngitsunik inissisimaffeqarpugut. Tamanna atuuppoq partiinut aaqqissuusseqqinnermi ilaasunut, ilaanninnissamullu aalajangiussaqaarsimasunut isumaqatigiinninnerit nalaanni suleqatigiittut tamaasa qutsaviginiarpakka.

Akileraartarnermik aaqqissuusseqqinneq tamakkiisumik aningaasaliiffigineqarpoq, tamannalu siunnersuutip oqaaseqaataani, aammalu Aningaasaqarnermut Akileraartarnermullu Ataatsimiititaliamut akissutini nassuiarneqarpoq.

Ukiuni kingullerni nunatta aningaasaqarnera patajaatsumik ineriartorpoq. Ukiumit ukiumut nunatta karsiata naatsorsuutaani annertuunik sinneqartooruteqarfiuvoq. Tamanna minnerunngitsumik Naalakkersuisut akisussaasumik aningaasaqarnikkut aqutsineranik patsiseqarpoq, tamaanimi pisortani aningaasartuutit annertusiartornerat killilersorneqarpoq. 2025-mut aningaasanut inatsisissatut siunnersuummi 2025-mi, aamma ukiuni missingersuusiorfinni sinneqartooruteqaqqinnissaq suliaqarfiuvoq. Akileraarutitigut isertitanik appartitsinissap naapertuullunilu naammaginaruunera Naalakkersuisut isumaqarfigaat, taamaaliornikkullu Nunatta Karsiata sinneqartoorutai annikillisinneqassapput, paarlattuanillu innuttaasut kaasarfimminni ooriutaat amerlanerulissallutik. Akileraartarnermik aaqqissuusseqqinnermik peqatigitillugu nunatta aningaasaqarnikkut annertuallaamik naligiinngiffiunerata annikillisinnessaanut annertuumik alloriarpuq.

Sulisoqarnermut akitsuutip annertusinera 1 procentiuvoq. Sulisitsisoq ukiumut 1 mio. kr.-nik aningaasarsianut aningaasartuutilik taamaasilluni ukiumut ilassutitut 10.000 kr.-nik aningaasartuuteqalissaq. Allatut oqaatigalugu Naalakkersuisuniit isumaqanngilagut sulisoqarnermut akitsuutitigut allanngiineq inuussutissarsiutilinni anginerusuni imaluunniit mikinerusuni

aningaasaqarnermik ajalusoortitsisussa. Peqatigitillugu eqqaamassavarput, sulisoqarnermut akitsuutip 39 pct.-iata missaa pisortani sulisitsisunit matussuserneqartarmat.

Akileraartarnermik aaqqissuusseqqinneq – Nunarput najoruminarnerulersitsigu – aqutigalugu innuttaasuni amerlanerpaanut, aammalu annertunerpaamik pisariaqartitsisunut, tassalu annikitsunik aamma akunnattunik isertitalinnut iluaqutaasussanik qajannaatsunik akileraartarnermi oqilisaanerit Naalackersuisut nuannaarutigaa. Tassa imaappoq, perorsaasut, fabrikkini sulisut kiisalu eqimattat appasissumik akissarsiallit allat malunnartumik isertitami qaffannerannik misigisaqassasut, aaqqissuusseqqinneq tamakkiisumik atuutilereeripat.

Akileraartarnermik aaqqissuusseqqinneq siunissamut isiginnippoq, suliffeqarnissamut kajumissuseqarnermik annertusaalluni, taamaalillunilu siunissami imminik pilersugarinermut annertunerusumut tunngavissalersitsisoq.

Naalackersuisut taama oqaaseqarlutik siunnersuut allannguuteqartinnagu pingajussaaneerseqarnissaat inassutigaa.